



閩媛典第三百六十九卷

閩悟部列傳

漢 李南女

按後漢書李南傳南字孝山丹陽句容人篤學明於風角南女亦曉家術爲由拳縣人妻晨詣爨室卒有暴風婦便上堂從姑求歸辭其二親姑不許乃跪而泣曰家世傳術疾風卒起先吹竈突及井此禍爲婦女主爨者妾將亡之應因著其亡日乃聽還家如期卒

晉 魏夫人

按蔡偉魏夫人傳魏夫人者任城人也晉司徒劇陽文康公舒之女名華存字賢安幼而好道靜默恭謹讀莊老三傳五經百氏無不該覽志慕神仙味真耽元欲求冲舉常服胡麻散茯苓丸吐納氣液攝生夷靜親戚往來一無關見常欲別居閑處父母不許年二十四彊適太保掾南陽劉文字幼彥生二子長曰璞次曰瑗幼彥後爲修武令夫人心期幽靈精誠彌篤二子粗立乃離隔宇室齋于別寢將逾三月忽有太極真人安度明東華天神方諸青童扶桑碧阿陽谷神王景林真人小有僊

王清虛真人王褒來降褒謂夫人曰聞子密緯真氣注心三清勤苦至矣扶桑大帝君勅我授子神真之道青童君曰清虛天王卽汝之師也度明曰子苦心求道道今來矣景林真人曰虛皇鑒爾勤感太極已注子之僊名於玉札矣子其勗哉青童君又曰子不更聞上道內晨景玉經者仙道無緣得成後日當會陽滌山中爾謹密之王君乃命侍女華散條李明兌等便披雲蘊開玉笈出太上寶文八素隱書大洞真經靈書八道紫度炎光石精金馬神真虎文高僊羽元等經凡三十一卷卽手授夫人焉王君因告曰我昔於此學道遇南極夫人西城王君授我寶經三十一卷行之以成真人位爲小有洞天僊王今所授者卽南極元君西城王君之本文也此山洞臺乃清虛之別宮耳於是王君起立北向執書而祝曰太上三元九星高真虛微入道上清玉晨裒爲太帝所勅使教於魏華存是月丹良吉日戊申謹按寶書神金虎文大洞真經八素玉篇合三十一卷是裒昔精思於陽明西山受真人太師紫元夫人書也華存當謹按明法以成至真誦修虛道長爲飛僊有泄我書族及一門身爲下鬼塞諸河源九天有命敢告華存祝畢王君又曰我受祕訣於紫元君言聽教於師云此篇當傳諸真人不但我得而已子今獲之太帝命焉此書自我當七人得之以白玉爲簡青玉爲

字至華存則爲四矣於是景林又授夫人黃庭內景經令晝夜存念讀之萬遍後乃能洞觀鬼神安適六府調和三魂五臟生華色反嬰孩乃不死之道也於是四真吟唱各命玉女彈琴擊鐘吹簫合節而發歌歌畢王君解摘經中所修之節度及寶經之指歸行事之口訣諸要備訖徐乃別去是時太極真人命北寒玉女宋聯娟彈九氣之璈青童命東華玉女烟景珠擊西盈之鐘陽谷神王命神林玉女賈屈廷吹鳳唳之簫清虛真人命飛元玉女鮮于虛拊九合玉節太極真人發排空之歌青童吟太霞之曲神王諷晨啟之章清虛詠駕飈之詞既散後諸真元君日夕來降雖幼彥隔壁寂然莫知其後幼彥物故值天下荒亂夫人撫養內外旁救窮乏亦爲真僊默示其兆知中原將亂攜二子渡江璞爲庾亮司馬又爲溫太真司馬後至安成太守瑕爲陶太尉侃從事中郎將夫人自洛邑達江南盜寇之中凡所過處神明保佑常果元吉二子位既成立夫人因得真心齋靜累感真靈修真之益與日俱進凡住世八十三年以晉成帝咸和九年歲在甲午稱疾不行凡七日託劍化形而去

鮑姑

按裴劍傳奇鮑姑靚之女也晉太興元年靚于蔣山遇真人陰長生授變化之術累徵至黃門侍郎
求出爲南海太守時葛洪亦以散騎常侍求出爲勾漏令師事靚以姑嫁之其後姑與洪相次登
僊玉鵝峰卽姑飛昇處也至唐時人見其行灸于南海有崔煒者得其越井岡艾灼贅瘤無不愈者
徐仲女

按十六國春秋後趙錄徐仲東莞人仕勒爲外兵郎有女令首雅性虛淡不樂人間從容閒淨以佛
法自娛不願求聘父曰汝應外屬何得如此女曰端心集道絕想人外毀譽不動廉正自足何必三
從然後爲禮父曰汝欲獨善一身何能兼濟父母女曰立身行道方欲度脫一切何況二親耶仲以
問佛圖澄澄曰君歸家潔齋三日竟可來仲從之澄以胭脂磨麻油傅仲右掌令視之見一沙門在
衆中說法形狀似女具以白澄澄曰是君女先身出家益物往事如此若從其志方當榮拔六親令
身富貴仲還許之女便剪髮從澄及淨檢尼受戒立建賢寺澄以勒所遺剪花衲七條衣及象鼻澡
濯與之得覽羣籍經目必誦思致淵深神照詳遠一時道衆莫不宗焉

按太平御覽段龜龍涼州記云隱王美人張氏色艷出家爲道乃自投門樓雙股頓折口誦經顏色自若俄而死

梁 錢妙真

按武進縣志錢妙真毗陵田家女與妹依陶隱君居茅山誦黃庭內外篇積功修行閱三十餘歲普通三年七月其姊佩白練入燕洞而隱妹踵至扉已闔矣洞口至今有紫菖蒲碧桃在焉

北魏 拓拔氏女

按繁峙縣志拓拔氏之女潛遁佛行兵至投入石峽縱火焚之大雨如注後人遇旱積薪焚峽雨輒應東西邊石手足跡猶存

智僊姑

按定襄縣志僊姑永安間副尉智重顯女幼耽空寂年及笄不肯嫁禍福多能前知問之不語一日入山坐化奉而藏之于塔相傳有村人盜塔磚卽獲遣報因增其院宇焚修至今不絕

謝自然

按蓬溪縣志蓬民女謝自然不知何時人在小溪洞修行時有異人來溪上浣芝見自然著皮底鞵笑云好個謝自然騎牛上青天不看佛祖面打你一金鞭後自然于順慶府棲樂山行滿僊去

隋 黃氏女

按莆田縣志黃氏女築室于泉州同安縣東佛子岡修持淨戒後端坐蛻去真身不壞因立寺曰黃佛治平中更名鹿苑祈禱多應崇寧間部使者以狀聞賜號應大師

唐 邊氏女

按棗強縣志邊氏女名洞元生卽丰骨不凡有道氣早棄家于紫雲觀修行清苦不間寒暑復遇異人授以僊術開元初白日上昇刺史以狀聞元宗賜詔立碑觀下贈丹臺真人至今其地名邊村鄉人呼爲邊僊姑

尹氏女

按廣西通志尹氏女全州人幼不事鉛華居小洞煉丹葆真大曆二年上昇後人于所居紫潭上建尹氏觀至今丹竈存焉

眉娘

按全唐詩眉娘南海人盧姓生而眉長稱眉娘神針善繡順宗召入宮中號神姑憲宗度爲女道士稱趙遙大師放歸後數年尸解

和娘

按太平清話柳子厚女和娘得病更名佛婢旣愈去髮爲尼號初心

何軫妻劉氏

按酉陽雜俎何軫鬻販爲業妻劉氏少斷酒肉常持金剛經先焚香像前願年止四十五臨終心不亂先知死日至太和四年冬四十五矣悉捨資裝供僧遍別親故何軫以爲病魅不信至歲除日請僧受八關沐浴易衣獨處一室跌坐高聲念經及辨色悄然兒女排室入看之已卒頂熱灼手軫以僧禮葬塔在荊州北郭

韋氏女

按酉陽雜俎興元城固縣有韋氏女兩歲能語自然識字好讀佛經至五歲一縣所有經悉讀遍至

古今圖書集成
八歲忽清晨熏衣靚粧默存牖下父母訝移時不出視之已蛻衣而失竟不知何之荊州處士許卑
得于韋氏鄰人張弘郢

姚婆

按潞安府志姚婆上黨人因范行婆約修西方精心念佛一日佛菩薩從空接引與范行婆相別遂
立化聞僊樂有異香

樂氏二女

按壺關縣志樂氏二女屯留人其先世貫陵川商微子後也母感神光而娠誕有奇德後移家于壺
關紫團山事繼母甚孝因採芝遇風昇僊

馬愛娘

按中江縣志愛娘號黃鹿真人東梓人也姓馬名道興年七歲失所怙恃鞠育於大父少不喜華飾
雅性冲虛欣慕黃老之學日誦千言一覽輒能記憶雖風雨寒暑不輟或勸以子女之職當勤婦工
而歸慕元虛何補容德但笑而不答人莫知其意時有野服黃冠士年踰七十顏如渥丹貨藥於市

愛娘于戶隙見之如有夙契因延至內坐請問修真之訣師資相投遂授鉛汞符篆要術於是束髮頂冠歸身至道因與易道興之名一日請別愛娘詰其姓氏曰汝無問我久當自知留詩而去詩云女是寄生枝男是冬青木冬青駕白鵝寄生跨黃鹿若遇寇相臨穩便拋家族早早上三清莫候丹砂熟愛娘旦暮諷誦不絕於口俄而年已及笄大父逼欲許聘族議詳定確不可辭愛娘歔歔流涕膝行而前曰女宿植不幸幼鍾酷罰膝下愛養將終身焉今蒙家長之諭雖恩德深重存亡銜戢然野性荒疎志友麋鹿舉案之勤非女所願大父憫之不靳其欲翌日命一女奴攜囊杖策穿雲而去既而夜徑林麓迷失故道忽覩燈燭熒耀若相引導者愛娘躡足潛窺見衣冠五人宛然古圖畫中所繪俱厲聲曰卜庵於此卽成道矣言訖隱去質明愛娘徘徊四顧見山朝水會氣象鬱然真神仙之窟宅遂稽顙拜禮謂女奴曰自非神人指示何以臻此乃尋訪居民詢以職方所載隸屬之部居人曰東南之梓州涪城中江西北之綿州巴西羅江相距各五十里爲界卞市是時世道多屯盜賊蠭起仍歲荒歉愛娘爲捐所有墾闢荒蕪疏鑿污塞播種以時使民無艱食之患歷四十餘年修真養氣日復精勤歲在懸車童顏不易營建別館以延有道之士一日舊所遇貨藥者忽至謂曰汝之

功業漸已成矣而外丹未應今以相授乃於瓢中取藥點土石爲金銀各百以填丹臺祝之曰勿用自守自有神護歷三載丹砂自成則汝脫身輕舉矣勉勵前修慎無中廢嗣後屢有盜賊睥睨鎮壇之物中夜變怪百出無不狼狽而走將及暮年風雨暴至壇下地裂甘泉沸湧銀變白鵝遊於池金變黃鹿出於市人無得而近之者至唐天祐改元八月朱全忠行崔杼之事昭宗崩全忠矯詔立輝王唐運告終奸雄蝟奮三年正月羣盜踵愛娘之庵抽戈直前愛娘語之曰汝等敢行恣睢悖逆天理乎苟無害居人庵中所積悉以相餉兇人將加害已而黃鹿白鵝突然而至愛娘於是跨鹿風雲四起白鵝翔鳴前後揖引騰空而去舊有丹竈尙存至是烈如雷吼爐中光彩射天少頃空中陰靄天雨琉璃擲地有聲歷時而化異香馥郁終日不散羣盜悲哀悔謝投戈而退居人以其德及人也深衆廣其庵以狀聞於蜀主王建建顧謂侍臣曰此蜀國祥事也遂以卞市爲黃鹿鎮

武信王五女

按十國春秋荆南武信王五女失其名相傳五女俱幼年好道薙髮爲女僧各止一處一曰佛華寺一曰菩提寺一曰莊嚴寺一曰石佛寺一曰法輪寺

宋 預浩女

按歸田錄開寶寺塔在京師諸塔中最高而制度甚精都料匠預浩所造也世傳浩惟一女年十餘歲每臥則交手于脅爲結構狀如此踰年撰成木經三卷今行于世者是也

趙普二女

按宋史趙普傳普卒二女皆笄普妻和氏言願爲尼太宗再三諭之不能奪賜長女名志願號智果大師次女名志英號智圓大師

俞次尙妻

按談圃俞次尙與其妻素達理性次尙病呼其妻曰我將死時次尙二子在外妻曰我欲先死君俟諸子至未晚也其妻奄然而化次尙爲文誌其墓已而諸子至明日告曰吾亦行矣卽熏沐趺坐而化

朱道誠妻王氏

按聞見近錄金州推官母王氏朱道誠之妻也日誦十句觀音心呪時年四十九病篤家人方治後

古今圖書集成
事王氏恍然見青衣人曰爾平生持觀音心咒但復少十九字增之當益壽王曰我不識字奈何青衣曰隨聲誦記之乃曰天羅神地羅神心離難難離身一切災殃化爲塵久之而醒疾亦尋愈後年至七十九

啞女

按寧波府志啞女者莫詳其姓氏亦不知何許人熙寧中見于鄞之戒香寺婉孌卅角年若及笄瘖不能言惟日持帚垂臂跣足晨粥午飯每拾芥滓餲餘啖人以爲顛歷人家預知吉凶以爲欣戚里士周鐸學舉子業女屢至其家鐸知其非常至則必延以蔬飯一日忽起書偈于壁曰三界火地衆苦具備報汝諸人求早出離後又造鐸值鐸趣裝將赴舉女笑不止鐸叩之遂索筆作長短句云風波未息虛名浮利終無益不如早去披蓑笠高臥煙霞千古企難及君今旣已裝行色定應雁塔題名籍他年若到南雄驛玉石休分徒累卞和泣鐸襲而藏之一日露臥鎮明嶺下或訶以不檢遽起歸寺長吁坐逝時三月三日也鐸爲具棺槨瘞之柳亭後鐸見女於京師追問之不就歸發其瘞則空棺也後鐸果如南雄以言邊事忤時相入黨籍衛開客洛陽遇李士寧曰公鄉里啞女過去維衛

也子可歸禮之比歸已化開以不及見爲恨明年游錢塘寓書吏陳式家見羣兒數十執旛蓋擁一女尼童入門諱傳曰啞啞開驚顧女索紙筆書偈云大地山河是阿誰了無一法可思惟夜來處處鳴鐘鼓敲破髑髏人不知又云須彌山上擺鐸大洋海底搖鈴若問啞女姓氏只此便是眞名擲筆竟去開復追問小兒啞女何人曰維衛佛也又問兒等何人曰問取啞女忽俱不見

王達妻某氏

按後山談叢王學士達妻某氏妾常辱之懇于達不受亦不較也或問之曰彼將去矣不必較也已而達怒逐之某盡歸其裝一家皆諫止之曰此自彼有我何與焉然亦非彼所有也妾尋遇盜盡亡其資常語家人今夕甘露下使以器取之又謂達曰新婦妾某日當死以後事累公皆然

蔣念二孺人

按括異志海鹽縣蔣念二孺人日誦大乘斷除嗜欲一日洗漱更衣燒香念佛書頌而終頌曰看過蓮經萬四千平生香火有因緣西方自是吾歸路風月同乘般若船

梅詢女

按羅湖野錄直龍圖閣梅公詢之女號空室道人幼聰慧樂于禪寂因從夫守官豫章之分寧遂叅死心禪師于雲巖旣于言下領旨自爾叢林知名政和間居金陵圖悟禪師住蔣山佛眼禪師亦在焉因機語相契二師稱賞然道韻閑淡似不能言者至于開廓正見雅爲精峭後于姑蘇西竺院薙髮爲尼名惟久宣和六年跌坐而終道人生于華胄不爲富貴籠絡傑然追蹤月上女直趨無上菩提又變形服與鐵磨爲伍至于生死之際効驗異常非志烈秋霜疇克爾耶

俞道婆

按羅湖野錄金陵俞道婆者叅見琅琊啟禪師家以鬻油爲業一日聞句者唱蓮花樂于市云不因柳毅傳書信何緣得到洞庭湖忽有省不覺大笑拋棄油資與市兒競拾其夫詎曰爾何顛耶婆撫掌曰若個不顛自是見僧必勘驗時有僧過其門婆遽呼曰兒兒僧曰媽媽爹爹在甚麼處婆轉身拜露柱僧卽踏倒曰將謂有多少奇特次見僧問曰上座甚處來僧曰五祖來婆曰五祖長老猶是婆兒子在僧曰婆婆却是誰兒婆曰老婆被上座一問直得立地放尿其頌婆子偷趙州筍因緣曰虎穴魔宮到者稀老婆失脚又懷疑趙州喫掌無人會直至如今成是非宣政間江淮爲禪納淵

藪婆子是時吹無孔笛韻出清霄遂致和者旁午而至機緣偈句流布於世自有賞音爲一唱而三歎也

黃姑

按新會縣志黃姑歸德都人生於皇祐己丑其父母富而無子惟姑承之性少慧因看芭蕉有感遂不適人工紡績以家財買田萬頃施於廣之光孝韶之南華及開元東禪西禪仁王龍興等寺而光孝尤多紹興元年卒年八十三光孝寺僧爲立祠墓左卽圓明莊聚寶庵也黃子長詩云圓明莊在海之隈老我尋幽始一來自是好山藏世界非關弱水隔蓬萊鷗沙鷺渚皆宜稼粉壁雕牆半是苔笑問檀那黃氏子許多因果爲誰栽

呂媼

按春渚紀聞湖州孫略教授家婢名呂媼服勤孫氏有年矣性謹朴無他能但常日晨起就廚中取食器潔之聚所棄餘粒間有落溝渠者亦拾取淘濯置於釜中或加五味煮食之未嘗一口廢也年七十餘一日微疾卽告其家人曰爲我髣髴著五戒衣我將去矣家人從之因起以左手結印而化

家人遂龕置開元寺中觀者餘月了無穢氣而髮漸生因與剃之後一月一剃

饒腴妻何氏

按金谿縣志何氏名師韞字季才抱甕先生天棐女也日誦千言父以比謝道韞適葆光先生從子饒腴喜浮屠教遍闔華嚴諸經一日偕夫往白楊山寺作失假山偈曰片石亡來歲月深昔時求覓到如今誰知只在家山裏枉費工夫別處尋四十孀居紹興間魏公張浚迎侍母鎮國太夫人帥閩道出界山太夫人亦通禪學聞其名踵門求見與語契合呼爲無生法友自號懶愚道人有詩集

唐廣貞

按長洲縣志唐廣貞嚴州人既嫁得血疾夢道人與藥服而愈遂與夫仳離從而入道徑往平江謁蓑衣何先生何稱爲僊姑號爲無思道人淳熙壬寅二月赴郭氏飯未竟驀然還寓廬卽昏兀如醉兩夕小蘇言方在郭家飯次若有喚我者出門逢呂純陽曹混成猷道僧三人引至海邊跨大蝦渡海因隨遊名山洞府及到冥司純陽令往元靜吳真人洞中學書書大字寫詩二百餘篇純陽問曰汝欲超凡入聖耶身外有身耶留形住世耶棄骨成僊耶對曰有母尙存願盡孝道曰如是則且留